

MANIFESTU DE SOS ISCRITORES LIMBUDOS
LÀCONI (OR), 17.09.2006

Unos cantos iscritores de sa minoria linguistica sarda, paris cun àteros operadores linguisticos, si sunt atobiados domìniga 17.09.2006 in Làconi (OR) pro arresonare cara a pare de limba, literadura, poesia, editoria, polìtica linguistica e identidade comunitària de su pòpulu sardu. S'ant postu, comente nòmene provisòriu, "Limbudos". Una manera fintzas brullana de fàghere a cumprèndere chi si distinghent dae àteros iscritores pro s'impreu de su sardu.

Dae su cunfrontu, chi at tentu sa dura de unu mangianu intreu, nd'est essidu foras su disìgiu de sighire a si biere e a si faeddare, pro chircare de acumprìre fainas, meledos e iniciativas bonas pro su tempus benidore de sa limba. Su chi s'est printzipiadu est unu coordinamentu non de pessones ebbia, ma de sentidos, ideas, parres e ànimos fintzas diferentes, ma chi si reconnoschent in paritzos puntos de ghia chi ant comente coro e punna sa chistione de sa limba e de sa literadura de sa minoria linguistica sarda in die de oe.

Non b'est su presumu de rapresentare totu sos iscritores chi iscrient in sardu, nen totu sa cumplexidade de sa literadura regionale in calesiat limbàgiu siat iscrita, ma de pònnere paris pentzos e esperiènzias de argunos iscritores, e de àteros operadores de sa minoria linguistica sarda, gasi comente est reconnota dae leges de s'Istadu italianu de s'Europa. In prus b'at àpidu su bisòngiu de iscaretzire argumentos e chistiones pro lòmperu a unu fundamentu comunu chi potzat èssere s'àndala maistra pro su traballu chi b'est de fàghere.

Is iscritores limbudos, e sos àteros operadores linguisticos:

- si sapint de sas difficultades de sa limba e de sa literadura de sa minoria linguistica a die de oe e diant bòlere agiudare cun fatos concretos sa sotziedade tzivile e polìtica sarda pro ddas interessare a sa sorte de sa limba nostra;
- iscumproant chi est urgente a curricularizare s'insignamentu e s'impreu veicolare de su sardu in is iscolas comente atzione politica chi potzat difùndere de a beru sa limba e difèndere mèngius sa literadura limbuda;
- pensant chi siat pretzisu chi in s'istatutu regionale nou depat intrare unu artìculu chi inditet su sardu comente "*limba de s'identidade istòrica de sos Sardos e de sa Sardigna*";
- apògiant s'isperimentatzione chi est faghende sa Regione Autònoma de sa Sardigna cun sa Limba Sarda Comuna pro sos atos ufiziales gosi comente est, proite rapresentat sa cunfirma chi su sardu est una limba unitària chi depet respetare sas bariedades naturales-locales;
- arresonant e sighint a arresonare si est pretzisu e comente si podet fàghere a impreare s'istandard fintzas in òperas artìsticas, ma cun parres e sensibilidades diferentes e de cada casta chi ant a dèvere èssere averguados e ant a èssere pro custu un'impignu de cunfrontu democràticu fitianu;
- s'apensamentant pro chi in sas universades sardas, sende chi s'est isperimentada in custos annos calencuna atividade linguistica, si diat pòdere fàghere prus e mèngius cun sa punna crara de abalentare sa limba in impreos cuntemporàneos, in prus de connòschere e iscandaddare sa de su tempus coladu;

- pessant chi sa Crèsia Sarda, oe in die no mustret interessu de cabale a sa limba de s'identidade de sa gente nostra, cun sa cale, paritzos sardos bivent sa fide insoro;
- notant chi su bonu de giornales, televisiones e ràdios discrìminant e ignorant sa limba sarda e diant bòlere ischire su proite;
- promitint a issos matessi de non praticare su mètodu de chènschia ebbia, ma de organizzare e traballare issos pro primos a initziativas in favore de sa literadura e de sa limba cun sòtzios, seminàrios, cunvènnios, festivals, revistas, giassos telemàticos, iscolas e liberas universidades;
- cumbidant àteros iscritores a ddos agiudare e a aderire a custu manifestu. Cumbidant istitutziones, políticos, partidos, sòtzios e dogni sarda e sardu de bona voluntade de cumprèndere cantu podet èssere mannu pro su tempus benidore de Sardigna s'agiudu dadu dae sa literadura in limba sarda;

Ognunu est liberu de fàghere girare custu manifestu e de chircare adesiones e agiudos pro sa punna chi ddu est disinnada. Sos iscritores sardos limbudos aparitzant unu comitadu formadu dae issos matessi e dae chie at a cumpartzire sa copia e sas lìnias de custu documentu.

Sos fundadores de su Comitadu de sos Iscritores Limbudos :

Paola Alcioni
 Pinuccio Canu
 Francesco Casula
 Francesco Cheratzu
 Giuseppe Corongiu
 Tore Cubeddu
 Nanni Falconi
 Micheli Ladu
 Vanna Ledda
 Antoni Maria Pala
 Maria Antonietta Piga
 Giovanni Piga
 Paolo Pillonca
 Michele Pinna
 Gianfranco Pintore
 Anna Cristina Serra

Làconi, 17.09.2006

Sighint adesiones: